

REGIONAL NEWS BULLETIN

HEADLINES (EVENING)

- 1. Mizoram universal healthcare scheme (MUHCS) hnuaiah damdawi-in 13-a damlo mi 131-te inenkawlna senso atan cheng nuai 6, sing 7 chuang pek chhuah a ni tawh.
- 2. Adviser to chief minister (political) Pu Lalmuanpuia Punte chuan tun lai hian Myanmar raltlante avanga pawikhawihna pung ta thut anga sawi chu thu dik lo a ni, a ti.
- 3. Mumbai 26/11 firfiaka chetnaa mawhphurtua puh Tahawwur Rana chu US atangin NIA ten India-ah an la dawn
- 4. Sawrkar laipui chuan Pradhan Mantri Poshan Shakti Nirman (PM POSHAN) Scheme atana sum sen tur chu zaa 9.50 in a ti pung.



MUHCS

Mizoram universal healthcare scheme (MUHCS) hnuaiah damdawi-in 13-a damlo mi 131-te inenkawlna senso atan cheng nuai 6, sing 7 chuang pek chhuah a ni tawh.

Health care society CEO Dr. Biakthansangi’n Akashvani Aizawl a hrilh dani tun thla April ni 1-a MUHCS hmanga pawisa chawi lawk lo (cashless) a damlo 131 te enkawlna senso chu April ni 8, Thawhlejni atang khan pek chhuah tan a ni a. Mizoram hmun hrang hranga damdawi-in 13 - Mizoram State Cancer Institute (MSCI), Zoram Medical College & Hospital (ZMC&H), Civil Hospital Lunglei, Kolasib District Hospital, Serchhip District Hospital, Khawzawl District Hospital, Hnahthial District Hospital, Khawhai PHC, Rapha Daycare Centre, Zarkawt, Aizawl, Mamit District Hopital, Saitual District hospital, Khawbung PHC leh Chhingchhip PHC-a damlo mi 131 te bill pek chhuah tawh hi a vaiin cheng nuai 6, sing 7 chuang a ni a. Mizoram state cancer institute chu dawng tam ber niin, cheng nuai 2, sing 3, sang 5 leh 508 an dawng tawh a, ZMC-in dawtin, cheng nuai 2 sing 3, sang 5 leh 472 a dawng tawh a, Civil Hospital Lunglei chu dawng tam ber pathumna niin, cheng sing 4, sang 1, 255 a dawng tawh a ni.



DINTHAR LC

Dinthar veng Local Council kaihhruaina in Dinthar pawl hrang hrangin naktukah an veng chhungah Heroin hawng 440 manna a inhnamhnawiha puh

Pu Henry Lalbiakzinga Chhundeng laka lungawi loh lantir na'n kawng an zawh dawn.

Dinthar Branch YMA President Pu C. Zochhuanawma hnen atanga Akashvani thudawn danin, nizana Dinthar LC kaihhruai all NGO thukhawm chuan naktuk chawhma dar 11-ah tunhnaia ruihhlo thahnem tak, Heroin hawng 440 man chungchanga inhnamhnawiha puh, an veng mi, Henry Lalbiakzinga Chhundeng laka lungawi lohna lantirin kawng an zawh dawn a, he hunah hian an resolution siam chhiar chhuah a ni dawn a, Dinthar LC kaihhruaiin NGO zawng zawng bakah an veng chhunga primary school chin chunglam zawng zawngte an tel dawn a, veng chhunga dawr zawng zawng khar a ni dawn bawk a ni.

Nizan hmasa a Dinthar branch YMA executive thukhawm chuan thla hmasa March ni 15-a heroin kg 4 leh gram 722, cheng vaibelchhe 1 leh nuai 41 hu, man chungchanga inhnamhnawiha puh Henry Lalbiakzinga Chhundeng chu Vengchhung atangin an ensan thu sawiin YMA Member an nihna leh Chhiatni Fund an pe kir a. Branch YMA executive te thutkhawm lai hian Dinthar mipui thinrim chu pungkawmin an veng ti mualphotu a an puh, Henry Lalbiakzinga chu an venga awm atan an duh lo tih sawiin, veng chhung chhuahsan turin an au rual a ni.

Veng chhung hruaitute hmalakna an nghah tawh thu sawiin hmalakna a awm mai loh avangin an pungkawm tih an sawi a ni. Nizan dar 10 vel khan Dinthar veng thalai lungawi te chu Henry Lalbiakzinga Chhundeng inkawtah pungkawm lehin, ruihhlo an duh loh zia an au rualpui a. Pu Henry-a chenna gate banga thil ziah ran bak chu thil tih chhiat emaw buaina dang emaw a chhuak lova, zan dar 1 velah an tin darh ni a thu dawn a ni.

<><><>

REFUGEES, CRIME

Adviser to chief minister (political) Pu Lalmuanpuia Punte chuan tun lai hian social media hmanga Myanmar raltlante avanga pawikhawihna pung ta thut a tihdarh chu thu dik lo leh belhchian dawl lo a ni, a ti.

Pu Lalmuanpuia'n Akashvani Aizawl a hrilh danin hman ni lawka bike chesual, a chhungte hnena thudik sawi ngam lo avang ringawt pawh khan boruak a sosang hman a. Kut an thlak ni a sawi a, kutthlaktute Mizo tawng pai ni a a sawi avang khan Chin state atanga raltlante puhin tam tak chuan raltlante an dem nghal a. Police-te'n rang taka chhui chhuaka thudik an puan leh tak avangin boruak chhe tur a dai ta zawk a ni a ti a. Police-in September 2023 leh December 2024 inkara Mizorama dan bawhchhiatna thleng an chhinchhiah a an ziah luh chinah mi 3,210 man zinga za a 96 chu India ram mi an ni a, India ram mi rau rau zinga mi 2,833 (za zela 92) te chu Mizorama awm nghet an ni. Dan bawhchhetu an man zinga za zela 4 chauh hi Myanmar mi an ni a. Assam state ami hi 158 ni-in za zela 5 an tling a. Manipur mi 44 leh Tripura mi 24 te man zingah hian an tel bawk a ni a ti.

Zirlai hruaitu hlui Pu Lalmuanpuia chuan tualchhungmite'n pawli lian tak an khawih a mena thlak a nih lai-in raltlanin dan bawhchhiatna pawli tham lo an khawih ve hlek chuan social media lamah a thawm a ring bik niin a sawi a. Hei hian Mizo hnam hmun hrang hranga awmte inzawmna leh inunauna a tichhe palh ang tih a hlahu thu leh hetiang zawnga unaute laka rilru chhe tak pute hi hrilhfiah an ngai a a hriat thu a sawi bawk a ni.



YMA

Kolasib sub-headquarters rorel inkhawmpui a palaite chuan khawtual mi-in raltlan nupui a a neihin branch YMA te'n an dawnsawn dan tur tihchian ni se an ti.

Vawiin khan Kolasib Sub-Hqrs YMA rorel inkhawm vawi 9-na chu Bilkhawthlir a LR Futsal Ground ah neih hman a ni a. Rorel inkhawmah hian YMA khawih thil bikah- 'Raltlan zinga mi in khaw tual (Mizoram mi) hmeichhia nupuia a neih a, Branch YMA ten kan lo dawnsawn dan tur chungchang tihchian ni rawh se' tih leh 'YMA te'n khawhar in lenpuina a lenglawng hla sak chin hi a hluar zel loh nan CYMA in hma la-in, inkaihhruaina siam rawhse' tih te pawm a ni a ni a. Sorkar khawih thil bikah- 'Rel lo lut tur kaihhnawih thilah Ram leh Hnam a him theih nan hmalak ni rawh se,' tih te, 'Kolasib Sub-Hqrs YMA huamchhunga Thingzai khawl lian (Saw Mill) hnam dangin Mizo hming hawha an neih tihtawp a nih theih nan chak taka hmalak ni rawh se,' tih te, 'Mizoram leh Assam inrina a Border Police Outpost kawng, Saipum leh Aitlangte PCC flooring a siam a nih theih nan sorkar in hma la rawh se,' tihte a tel a.

Hei bakah hian 'Hnamdang/State dang motor lo lut thinte'n motor registration plate an hliahkhuh thin hi ti tawh lo turin hmalak ni rawhse,' tih leh 'Kolasib District Hospital tihhmasawn a, a nihna ang taka thuam a nih theihna turin chak taka hmalak ni rawhse,' tih te an pawm a ni.

Sub-Hqrs YMA Secretary report-in a tarlan danin, Kolasib Sub-Hqrs YMA huamchhungah Group YMA 5 leh Kolasib Town Branch awmin, YMA Branch 89 a awm a. Member mipa 21,142 leh hmeichhia 13,131 awmin, Kolasib Sub-Hqrs huam chhungah member 34,273 an awm mek.

Kum 2026 Sub-Hqrs YMA rorel inkhawm chu Kolasib ah nghah a ni a, kum 2025-2026 budget atan nuai 15, sing 8, sang 3 leh 300 ruahman a ni.



RICE

ZPM Party-in kalphung thar mipui sorkar hnuaiah hun rei lote chhunga buhfai hum zat a pung chho chu lawmawm an tih thu an sawi.

ZPM-in vawiina thuchhuah an siamah Supply Minister Pu B. Lalchhanzova leh sorkar official te hmalakna a buhfai bothlau tur venna kal zelah buhfai kudam lama thawkte leh retailer-ten buhfai buk dik taka an pek chhuah tak avangin thla hmasa, March thla khan sorkar chuan buhfai quintal 7,566 leh kg. 61, cheng vbc 2 leh nuai 2 chuang hu zet a hum thei a ni an ti a. He mi avang hian thla khata mipui khul tur buhfai quintal 97,439 leh kg. 63 mamawh thin chu tun thla kal mek, April-a quota ngaihtuah belh ngai zat chu quintal 89,873 leg kg. 2-ah a tlakhniam theih phah niin an sawi. Hei hi ZPM Party chuan ram siamthatna kawnga hmasawna ropui takah an ngai tih

sawiin, a changtu Minister leh Sorkar official te thawhrimna an chhuang hle tih an sawi a ni.

ZPM chuan sorkarin thlatin buhfai quintal 7,576 kal ral tur a hum zel thei a nih chuan kum khatah buhfai quintal sing 9 chuang a tling thei dawn a. Kum khat chhungin sorkar pawisa cheng vbc 30 vel zet kalral tur a hum theih dawn avangin buhfai a man to a lei thin chu a tlakhniam tir dawn a. Mizoram pawna buhfai leina atana sorkar sum hman pawh a tlakhniam phah dawn bakah NFSA hnuaia Card eng leh card pawlah mi nuai khat zet thun theih an ni dawn a. Sorkarin mipui tana ngaihtuahna a sen avang hian kudam lama thawktute leh retailer-te pawhin buk dik taka buhfai pe chhuak chhunzawm zel turin an ngen tih an sawi a ni.

<><><>

CADC

Chakma autonomous district council (CADC) chuan Bangladesh ramri hung avanga in leh lo leh ram chante zangnadawmna sum pe chhuak thuai turin sorkar laipui an ngen.

Union minister of state for home Nityanand Rai hnenah he thu hi nimin khan CADC hotute'n an lo thlen a. Bangladesh ramri hung avanga chhungkaw tam takin an in leh lo leh ram an chan avanga zangnadawmna atana cheng vaibelchhe 118 leh nuai 75 pe tura Mizoram sorkar kaltlanga central sorkara dilna an thehluh chu home ministry remtihna nghah mek a nih thu minister of state hnenah hian lo thlenin phalsak thuai turin an ngen a. Hei bakah hian hmasawmna hna thawk tura ruahmanna project 47, kawng siam, zirna lam, sorkar inrelbawlna, thiam thil lam hmasawmna leh hnam ziarang humhalhna atana an thehluhte tun thlenga pawmpui lohva la awm leh tikhawtlai a ni chu pawl an tih thu leh he'ng project pawimawhte tihpuitlin theih lova a awm chu tha an tih loh thu an lo thlen bawk.

CADC thuneitute chuan an council-in sum harsatna namen lo an tawh dan Natyand Rai hnenah hian thlenin kum 2021-2022 tangka kuma council hnathawkte hlawh daih lova ruahman a nih avang khan 2024-2025 tangka kumah sum indaih lohna cheng vaibelchhe 54 leh nuai 70 chuang a awm niin an sawi a, chu chu tun tangka kum tharah hian siamrem a ngai dawn a ni an ti. Mizoram finance commission in autonomous council dang aiin CADC tan sum a ruahman tlem zawk chuan harsatna a siamsak niin an sawi bawk.

An sum harsatna, a bikin council hnathawkte hlawh indaihlohna phuhrukna atan hian a bik taka pek turin cheng vaibelchhe 70 an dil a. Union minister hnena memorandum an lo thehluhah chuan council huamchhunga inkalpawhna kawng chhe lutukte, Mizoram puma ziaak leh chhiar thiam za zela 91 point 58 a nih lai a za zela 46 chauh a nih thute, zirna sang zawk tlem lutuk leh hriselna lama an hniam bik ziate tarlangin ramchhunga autonomouse district council zingah CADC hi a hnufual ber a ni mek a ni, an ti.

CADC-a BJP sorkar chuan rampum huapa mitin hmasawmna kalpui mek chuan a thlen phak ve an beisei thu sawiin rei tak ngaihthah ni tawh Chakma mipui tana hmasawmna rualkhai thlen a hmasawmna atana tha an thawhte thlawp turin central sorkar an ngen a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

9/11

Mumbai 26/11 firfiaka chetnaa mawhphurtua puh Tahawwur Rana chu US atangin NIA ten India-ah an la dawn. Union Minister Piyush Goyal-a chuan hemi chungchang hi social media-ah tarlangin Prime Minister Narendra Modia tumruhna vangin Mumbai inbeihnaa mawhphurtua puh hi India-ah lak a ni dawn tih a sawi a. A phu tawh hremna pek ngei anih tur thu Pu Goyal-a chuan a sawi bawh a ni. Rana-a phurh hawna tur hian a bikin thlawhna ruahman a ni a. NIA headquarters te, Patiala Court leh hmun paiwmawh dangahte venhimna khauh takin kalpui a ni.

Nimin khan Union Home Minister Amit Shah-a chuan Tahawwur Rana lak a ni tur chu Modia sawrkar that zia lantirtu a ni a ti a. India mipuite chung a pawikhawihnaa mawhphurtute chu sawrkarin a man zel dawn tih a sawi a ni.

<><><>

DOMINICAN REPUBLIC

Dominican Republic khawpui Santo Domingo-a nighclub chung chimah mi 184 an thi. Vanduaiana thlenna hmunah hian chhanchhuah hna ngawrh takin thawh mek a ni a. Mi 145 chu dama chhanchhuah tawh niin hliam tuar mi 20 chu damdawiinah lak an ni a. An zinga mi 8 chu an na hle a ni.

Vanduaiana hi nizana thleng niin zaithiam lar tak Rubby Perez-a zai laiin inchung hi a chim a. Kum 69-a upa Rubby Perez pawh hi mitthi zingah hian a tel a ni.

<><><>

PM POSHAN

Sawrkar laipui chuan Pradhan Mantri Poshan Shakti Nirman (PM POSHAN) Scheme atana sum sen tur chu zaa 9.50 in a ti pung. He scheme hi sawrkar laipui tum vek niin ramchhunga sawrkar sikula zirlai vaibelchhe 11 chuangte hnenah chaw chhun a thlawna semna scheme a ni a. Tuna sawrkar ruahmanna thar hi state leh UT tinah thlaleh ni 1 atangin hman tan anih tur chu Union Education Ministry chuan a sawi a ni. Kum 2025-26 chhungin cheng vaibelchhe 954 sen a ni ang.

<><><>